



ZHONGGUOJIUWENXIAN
SHIWEN JICHENG

中国酒文献诗文集


第三册

宋辽金元酒诗文集一

李修余 彭贵川 胡春秀 编著

 中国文史出版社

中国酒文献诗文集



ISBN 978-7-5034-9864-4



9 787503 498644

定价：6800.00元
(全八卷·十册)



ZHONGGUO JIUWENXIAN
SHIWEN JICHENG

中国酒文献诗文集成

第三册 宋辽金元酒诗文集一

李修余 彭贵川 胡春秀 编著

 中国文史出版社



宋辽金元酒诗文



薛居正

薛居正（912—981），字子平，开封浚仪（今河南开封）人。后唐清泰二年（935）进士，历任后晋、汉、周。宋初为户部侍郎，出知许州，入为枢密直学士，后知朗州。乾德中，以兵部侍郎参知政事。开宝五年（972），受诏监修《五代史》。六年，拜门下侍郎、平章事。太平兴国初，加左仆射、昭文馆大学士，从平北汉还，进位司空，卒。赠太尉、中书令，谥文惠。有集三十卷。《宋史》有传。

旧五代史（选录）

卷二 梁书二 太祖纪第二（节录）（天复二年四月）丁酉，唐丞相崔胤自华来谒帝，屡述艰运危急，事不可缓，又虑群阉拥昭宗幸蜀，且告帝，帝为动容。胤将辞，启宴于府署，帝举酒，胤情激于衷，因自持乐板，声曲以侑酒。

（天复）三年正月甲寅，岐人启壁，唐昭宗降使宣问慰劳，兼传密旨。寻又命翰林学士韩渥、赵国夫人宠颜赍诏押赐帝紫金酒器、御衣玉带。

昭宗命延于寝室见何皇后，面赐酒器及衣物。

卷四 梁书四 太祖纪第四（节录）帝以去年发军之日不利，有违兵法，并释放，兼各赐分物酒食劳问。

（开平二年十月）丙午，御球场殿，宣夹马都指挥使尹皓、韩瑋以下将士五百人，赐酒食。

卷七 梁书七 太祖纪第七（节录）（乾化二年）二月庚戌，中和节，御崇勋殿，召丞相、大学士、河南尹，略对讫，于万春门外庑赐以酒食。

（乾化二年三月）壬辰，命以羊酒等各赐从官。

（乾化二年四月）己未，次黎阳县。东都留守官吏奉表起居，赐丞相、从官酒食有差。

卷十二 梁书十二 宗室列传第二（节录）博王友文，本姓康，名勤，太祖养以为子，受禅后封为王。为东京留守，嗜酒，颇怠于为政。

卷十三 梁书十三（节录）（朱）瑾有所乘名马，冬以锦帐贮之，夏以罗幃护之。爱妓桃氏有绝色，善歌舞。及知训至，奉卮酒为寿，初以名马奉，知训喜而言曰：“相公出镇，与吾暂别，离恨可知，愿此尽欢。”瑾即延知训于中堂，出桃氏。酒既醉，瑾斩知训首，示其部下。

时使者宣诏讫，（王）师范盛启宴席，令昆仲子弟列座，谓使者曰：“死者人所不能免，况有罪乎！然予惧坑尸于下，少长失序，恐有愧于先人。”行酒之次，令少长依次于坑所受戮，人士痛之。

卷十四 梁书十四（节录）（罗绍威）又于魏州建元帅府署，沿道置亭候，供牲牢、酒糒、军幕、什器，上下数十万人，一无阙者。

（罗绍威）好招延文士，聚书万卷，开学馆，置书楼，每歌酒宴会，与宾佐赋诗，颇有情致。

卷十七 梁书十七（节录）初，泮、朗二州，本属荆南，乾宁中，为土豪雷满所据。（成）汭奏请割隶，唐宰相徐彦若执而不行，汭由是衔之。及彦若出镇南海，路过江陵，汭虽加延接，而犹怏怏。尝因对酒，语及其事，彦若曰：“令公位尊方面，自比桓、文，雷满者，偏州一草贼尔，令公何不加兵，而反怨朝廷乎！”汭赧然而屈。

(雷满)又尝于府署浚一深潭，构大亭于其上，每邻道使车经由，必召燕于中，且言：“此水府也，中有蛟龙，奇怪万态，唯余能游焉。”或酒酣对客，即取筵中宝器乱掷于潭中，因自褫其衣，裸露其文身，遽跃入水底，遍取所掷宝器，戏弄于水面，久之方出，重整衣就座，其诡诞如此。

卷十八 梁书十八（节录）（张策）即日肩舆归洛，居于福善里，修篁嘉木，图书琴酒，以自适焉。

卷二十二 梁书二十二（节录）向时河朔之俗，上元比屋夜游，及（杨）师厚作镇，乃课魏人户立灯竿，千缸万炬，洞照一城，纵士女嬉游。复彩画舟舫，令女妓棹歌于御河，纵酒弥日。

卷二十三 梁书二十三（节录）及将谒见，太祖令赐冠带，（刘）鄴曰：“累囚负罪，请就縶而入。”太祖不许。及见，慰抚移时，且饮之酒，鄴以量小告太祖。

卷二十四 梁书二十四（节录）冀王友谦初定陕府，命（卢）曾往议事，有使院小将从行，嗜酒，荒逸过度。曾复命，欲发其罪，致疏于袖中，累日未果言。小将恐事泄，先诬告曾使酒，几败军事，刘捍因证之，由是罢职，归于齐之别墅。

卷二十五 唐书一（节录）新城北有毗沙天王祠，祠前井一日沸溢，武皇因持卮酒而奠曰：“予有尊主济民之志，无何井溢，故未察其祸福，惟天王若有神奇，可与仆交谈。”奠酒未已，有神人被金甲持戈，隐然出于壁间，见者大惊走，唯武皇从容而退，繇是益自负。

俄而黄巢自江、淮北渡，武皇椎牛酹酒，飡其酋首，酒酣，喻之曰：“予父子为贼臣谗间，报国无由……”

是夜，张乐陈宴席，汴帅自佐飧，出珍币侑劝。武皇酒酣，戏诸侍妓，与汴帅握手，叙破贼事以为乐。

卷二十六 唐书二（节录）天子又遣延王、丹王赐武皇御衣及大将茶酒、弓矢，命二王兄事武皇。延王传天子密旨云：“日昨非卿至此，已为贼庭行酒之人矣……”

武皇方置酒高会，前锋又报“贼至矣”！

卷二十七 唐书三（节录）初令（庄宗）入觐献捷，迎驾还宫，昭宗一见骇之，曰：“此儿有奇表。”因抚其背曰：“儿将来之国栋也，勿忘忠孝于予家。”因赐鸚鵡酒卮、翡翠盘。

武皇起义云中，部下皆北边劲兵，及破贼迎銮，功居第一，由是稍优宠士伍，因多不法，或陵侮官吏，豪夺士民，白昼剽攘，酒博喧竞。

武皇于祠前置酒，乐作，伶人奏百年歌者，陈其衰老之状，声调凄苦。武皇引满，捋须指帝曰：“老夫壮心未已，二十年后，此子必战于此。”

（天祐八年）秋七月，帝会王镕于承天军。镕，武皇之友也，帝奉之尽敬，捧卮酒为寿，镕亦捧酒酬帝。

卷二十九 唐书五（节录）时帝方与诸将宴，酒酣乐作，闻（王）镕遇弑，遽投觥而泣曰：“赵王与吾把臂同盟，分如金石，何负于人，覆宗绝祀，冤哉！”

（李）嗣源飞驿告捷，帝置酒大悦，曰：“是当决行渡河之策。”

卷三十 唐书六（节录）（同光元年冬十月）己亥，宴勋臣于崇元殿，梁室故将咸预焉。帝酒酣，谓李嗣源曰：“今日宴客，皆吾前日之勍敌，一旦同会，皆卿前锋之力也。”梁将霍彦威、戴思远等皆伏陛叩头，帝因赐御衣、酒器，尽欢而罢。

卷三十二 唐书八（节录）（同光二年九月）甲寅，幸郭崇韬第，置酒作乐。

（同光二年十一月）戊午，幸李嗣源、李绍荣之第，纵酒作乐。

（同光二年十二月）庚午，帝与皇后刘氏幸张全义第，酒酣，帝命皇后拜全义为养父，全义惶恐致谢，复出珍货贡献。

（同光三年三月辛亥）帝渡河南观废栅旧址，至杨村寨，沿河至戚城，置酒作乐而罢。



卷三十三 唐书九（节录）（同光三年十一月）丁未，高丽国遣使贡方物。康延孝、李严至汉州，王衍遣人送牛酒请降，李严遂先入成都。

卷三十四 唐书十（节录）（同光四年二月）辛丑，元行钦至邺都，进攻南门，以诏书招谕城中，赵在礼献羊酒劳军。

是时，李嗣源已入于汴，帝闻诸军离散，精神沮丧，至万胜镇即命旋师。登路旁荒冢，置酒视诸将流涕。俄有野人进雉，因问冢名，对曰：“里人相传为愁台。”帝弥不悦，罢酒而去。

（同光四年三月）甲戌，次石桥，帝置酒野次，悲啼不乐。

卷三十五 唐书十一（节录）帝四中流矢，血流被股，武皇解衣授药，手赐卮酒，抚其背曰：“吾儿神人也，微吾儿几为从周所笑。”自青山之战，名闻天下。

两军既成列，庄宗以梁军甚盛，虑师人之怯，欲激壮之，手持白金巨钟赐帝酒，谓之曰：“卿见南军白马、赤马都否？睹之令人胆破。”

（元）行钦酣战不解，矢亦中帝股，拔矢复战。行钦穷蹙，面缚乞降，帝酌酒饮之，拊其背曰：“吾子壮士也！”因厚遇之。

卷四十 唐书十六（节录）先是，帝巡幸汴州，留（李）从璨以警大内，从璨因游会节园，酒酣，戏登御榻。

卷四十三 唐书十九（节录）（长兴三年十二月）癸丑，幸龙门，观修伊水石堰，赐丁夫酒食。

卷四十五 唐书二十一（节录）辛未，帝御中兴殿，群臣列位，冯道升阶进酒，帝曰：“比于此物无爱，除宾友之会，不近樽罍。况在沉痛之中，安事饮啖！”命彻之。

卷四十六 唐书二十二（节录）梁军退却，帝以十数骑杂梁军而退，至垒门大呼，斩首数级，斧其望橰而还。庄宗大噉曰：“壮哉，阿三！”赐酒一器。

（长兴二年九月）壬子，中书门下举行长兴三年敕，常年荐送举人，州郡行乡饮酒之时，帖太常草定仪注奏闻。

卷四十八 唐书二十四（节录）（清泰三年春正月）乙巳，以上元夜京城张灯，帝微行，置酒于赵延寿之第。

（清泰三年八月）己巳，云州沙彦珣奏，供奉官李让勋送夏衣到州，纵酒凌轹军都行，劫杀兵马都监张思殷、都指挥党行进，其李让勋已处斩讫。

卷五十一 唐书二十七（节录）明宗幸汴，留（李）从璨为大内皇城使。一日，召宾友于会节园，酒酣之后，戏登于御榻。

卷五十二 唐书二十八（节录）（李嗣昭）初嗜酒好乐，武皇微伸儆戒，乃终身不饮。

（天祐）十七年六月，嗣昭自德胜归藩，庄宗帐钱于戚城。庄宗酒酣，泣而言曰：“河朔生灵，十年馈挽，引领鹤望，俟破汴军。今赋不充，寇孽犹在，坐食军赋，有愧蒸民。”

卷五十三 唐书二十九（节录）初，军中以为戏，月余桥成，制度条直，人皆服其勤智。庄宗举酒曰：“（李）存进，吾之杜预也。”

卷五十四 唐书三十（节录）（王）镕既失燕之援，会武皇出师以逼真定，镕遣使谢罪，出绢二十万匹，及具牛酒犒军，自是与镕修好如初。

卷五十五 唐书三十一（节录）九月，（康）君立至太原，武皇会诸将酒博，因语及（李）存孝事，流涕不已。时君立以一言忤旨，武皇赐酖而殁。

武皇遇难于上源驿，汴将杨彦洪连车树栅，遮绝巷陌，时骑从皆醉，宴席既阑，汴军四面攻传舍。（薛）志勤虢勇冠绝，复酒胆激壮，因独登驿楼大呼曰：“朱仆射负恩无行，邀我司空图之，吾三百人足以济事！”因弯弧发矢，无虚发，汴人毙者数十。

卷五十七 唐书三十三（节录） 庄宗御嘉庆殿，置酒宴征西诸将，举酒属崇韬曰：“继岌未习军政，卿久从吾战伐，西面之事，属之于卿。”

卷六十 唐书三十六（节录） 初，（李）德裕之为将相也，大有助于王室，出藩入辅，绵历累朝。及留守洛阳，有终焉之志，于平泉置别墅，采天下奇花异竹、珍木怪石，为园池之玩。自为家诫序录，志其草木之得处，刊于石，云：“移吾片石，折树一枝，非子孙也。”洎巢、蔡之乱，洛都灰烬，全义披榛而创都邑，李氏花木，多为都下移掘，樵人鬻卖，园亭扫地矣。有醒酒石，德裕醉即踞之，最保惜者。光化初，中使有监全义军得此石，置于家园，敬义知之，泣谓全义曰：“平泉别业，吾祖戒约甚严，子孙不肖，动违先旨。”因托全义请石于监军。他日宴会，全义谓监军曰：“李员外泣告，言内侍得卫公醒酒石，其祖戒堪哀，内侍能回移否？”监军忿然厉声曰：“黄巢败后，谁家园池完复，岂独平泉有石哉！”全义始受黄巢伪命，以为诟己，大怒曰：“吾今为唐臣，非巢贼也。”即署奏笞毙之。

梁祖既受命，宴于玄德殿，举酒曰：“朕夹辅日浅，代德未隆，置朕及此者，群公推崇之意也。”

卷六十一 唐书三十七（节录） 先是，秦、雍之间，令长设酒食，私丐于部民者，俗谓之“捣蒜”。

卷六十二 唐书三十八（节录） （张文礼）在镇州既久，见其政荒人僻，常蓄异图，酒酣之后，对左右每泄恶言，闻者莫不寒心。

卷六十三 唐书三十九（节录） 每农祥劝耕之始，（张）全义必自立畎亩，饷以酒食，政宽事简，吏不敢欺。

卷六十四 唐书四十（节录） 一日，庄宗于崇元殿宴诸将，（霍）彦威与段凝、袁象先等预会。酒酣，庄宗举酒属明宗曰：“此席宴客，皆吾前岁之劲敌也，一旦与吾同宴，盖卿前锋之效也。”

庄宗尝幸汉宾之第，汉宾妻进酒上食，奏家乐以娱之，自是汉宾颇蒙宠待。同光四年正月，冀王朱友谦入朝，明宗居洛阳，以友谦故人，置酒于第。庄宗诸弟在席，友谦坐在永王存霸之上。酒酣，汉宾以大觥奉友谦曰：“公虽名位高，坐于皇弟之上，非宜也。仆与公俱在梁朝，以宗盟相厚，自公入朝，三发单函候问，略无报复，忽余位卑，不亦甚乎！”

卷六十七 唐书四十三（节录） 初，判官王缄从军掌文翰，胡柳之役，缄歿于军。庄宗归宁太原，置酒公宴，举酒谓张承业曰：“予今于此会取一书记，先以卮酒辟之。”即举酒属巡官冯道，道以所举非次，抗酒辞避，庄宗曰：“勿谦挹，无踰于卿也。”时以职列序迁，则程当为书记，汝弼亦左右之。

卷六十九 唐书四十五（节录） 宪沉静寡欲，喜聚图书，家书五千卷，视事之余，手自刊校。善弹琴，不饮酒。

十七年，庄宗自魏州之德胜，与宾僚城楼饯别，既而群僚离席，装独留，献诗三篇，意在章服。庄宗举大钟属装曰：“员外能醺此乎？”装饮酒素少，略无难色，为之一举而醺，庄宗即解紫袍赐之。

卷七十二 唐书四十八（节录） 武皇之讨王行瑜，（张）承业累奉使渭北，因留监武皇军事，贼平，改酒坊使。

庄宗岁时还晋阳宫省太后，须钱蒲博、给伶官，尝置酒于泉府，庄宗酣饮，命兴圣宫使李继岌为承业起舞，既竟，承业出宝带币马奉之。庄宗指钱积谓承业曰：“和哥无钱使，七哥与此一积，宝马非殊惠也。”承业谢曰：“郎君哥劳，承业自出己俸钱。此钱是大王库物，准拟支贍三军，不敢以公物为私礼也。”庄宗不悦，使酒侵承业。承业曰：“臣老敕使，非为子孙之谋，惜钱为大王基

业，王若自要散施，何妨老夫，不过财尽兵散，一事无成。”庄宗怒，顾元行钦曰：“取剑来！”承业引庄宗衣，泣而言曰：“仆荷先王遗顾，誓为本朝诛汴贼，为王惜库物，斩承业首，死亦无愧于先王，今日请死！”阎宝解承业手，令退。承业诟宝曰：“党朱温逆贼，未尝有一言效忠，而敢依谄附。”挥拳踏之。太后闻庄宗酒失，急召入。庄宗性至孝，闻太后召，叩头谢承业曰：“吾杯酒之间，忤于七哥，太后必怪吾。七哥为吾痛饮两卮分谤，可乎？”庄宗连饮四钟，劝承业，竟不饮。

是时，卢质在庄宗幕下，嗜酒轻傲，尝呼庄宗诸弟为豚犬，庄宗深衔之。

卷七十三 唐书四十九（节录）（毛璋）泊至潞州，狂妄不悛，每拥川妓于山亭院，服赭黄，纵酒，令为王衍在蜀之戏。

卷七十四 唐书五十（节录）（康）延孝既济，长驱过鹿头，进据汉州。居三日，部下后军方至。伪蜀六军使王宗弼令人持牛酒币马归款。

（同光三年）闰十二月，延孝因酒酣谓董璋曰：“吾有平蜀之功，公等仆邀相从，反首鼠于侍中之门，谋相倾陷。吾为都将，公乃裨校，力能斩首。”璋惶恐，谢之而退。酒罢，璋诉于郭崇韬，阴衔之，乃置董璋为东川节度使，落军职。

时孟知祥与任圜、董璋置酒高会，因引令延孝槛车至会。

卷七十六 晋书二（节录）是日，戎王举酒言于帝曰：“予远来赴义，大事已成，皇帝须赴京都……”

（天福二年四月）丁亥，制：“……河阳管内酒户百姓，应欠天福元年闰十一月二十五日已前，不敷年额曲钱，并放……”

卷七十八 晋书四（节录）（天福四年十二月）庚戌，礼官奏：“来岁正旦，王公上寿，皇帝举酒，奏玄同之乐；再饮，奏文同之乐；三饮，奏同前。”从之，歌辞不录。

卷七十九 晋书五（节录）（天福五年二月）庚戌，北京留守安彦威来朝，帝慰接甚厚，赐上尊酒。

卷八十二 晋书八（节录）（帝）登戚城古台，置酒以劳三将，咸咎（景）延广不遣兵赴难，相对泣下。

是日，（帝）置酒宫中，召景延广谓之曰：“卿有佐命之功，保厘伊、洛，非酬勋之地也。”

卷八十四 晋书十（节录）是日幸南庄，命臣僚泛舟饮酒，因幸杜威园，醉方归内。

卷八十五 晋书十一（节录）时移内库至府，帝使人取帛数段，主者不与，谓使者曰：“此非我所有也。”又使人诣李崧求酒，崧曰：“臣有酒非敢爱惜，虑陛下杯酌之后忧躁，所作别有不测之事，臣以此不敢奉进。”

帝伏地雨泣，自陈过咎，永康使左右扶帝上殿，慰劳久之，因命设乐行酒，从容而罢。

卷八十八 晋书十四（节录）（张）希崇素朴厚，尤嗜书，莅事之余，手不释卷，不好酒乐，不蓄姬仆，祁寒盛暑，必俨具衣冠，厮养之辈，未尝闻褻慢之言。

（史匡翰）既自端谨，不喜人醉。幕客有彻者，狂率酣饷，一日使酒，怒谓匡翰曰：“明公昔刺覃怀，与彻主客随至，事无不可，今领节钺，数不相容……”

高祖有天下，命为彰义军节度使，所至不治，政由群下。泊至泾原日，凶恣弥甚，每日于公庭列大鼎，烹肥豕，割截方寸以噉宾佐，皆流泪不能大嚼，俟其他顾，则致袂中。又命巨觥行酒，诉则辱之，乃有持杯伪饮，褰领袂而纳之者。

高祖有天下，命（张万进）为彰义军节度使，所至不治，政由群下。泊至泾原日，凶恣弥甚，每日于公庭列大鼎，烹肥豕，割截方寸以噉宾佐，皆流泪不能大嚼，俟其他顾，则致袂中。又命巨觥行酒，诉则辱之，乃有持杯伪饮，褰领袂而纳之者。

卷九十 晋书十六（节录）（张）钱，字慕彭，少嗜酒无节，为乡里所鄙。

卷九十三 晋书十九（节录） 天福初，（卢詹）拜礼部尚书，分司洛下，与右仆射卢质、散骑常侍卢重俱在西都，数相过从。三人俱嗜酒，好游山水，塔庙林亭花竹之地，无不同往，酣饮为乐，人无间然，洛中朝士目为“三卢会”。

后唐清泰中，（尹玉羽）为光禄少卿，退归秦中，以林泉诗酒自乐，自号自然先生。

唐天成中，（郑云叟）召拜左拾遗，不起，与罗隐之朝夕游处，隐之以药术取利，云叟以山田自给，俱好酒能诗，善长啸。有大瓠，云可辟寒暑，置酒于其中，经时味不坏，日携就花木水石之间，一酌一咏。尝因酒酣联句，郑曰：“一壶天上有名物，两个世间无事人。”罗曰：“醉却隐之、云叟外，不知何处是天真。”

云叟好酒，尝为《咏酒》诗千二百言，海内好名者书于缣绡，以为赠贶。

卷九十四 晋书二十（节录）（郭）金海好酒，所为不法，自潞州过山东，入邢洺界为刦盗，嗣昭虽知之，然惜其拳勇，每优容之。

一日至中书，宰臣冯道、赵莹、李崧、和凝在列，（刘）处让因酒酣，历诋诸相，道笑而不答。

卷九十六 晋书二十二（节录） 清泰初，冯道出镇同州，（胡）饶时为副使，道以重臣，稀于接洽，饶忿之，每乘酒于牙门诟道，道必延入，待以酒肴，致敬而退。

（陈玄）性好酒乐施，随得而无私积。

卷九十七 晋书二十三（节录） 一日，逢留司御史于天津桥，从兵百人，不分路而过，排御史于水中，（张）从宾给奏其酒醉，其凶傲如此。

卷九十八 晋书二十四（节录）（张）彦泽自谓有功于契丹，昼夜以酒乐自娱。

开运末，（张砺）与契丹居南松之内，轩轳交织，多继烛接洽，无厌倦色。因密言曰：“此人用法如此，岂能久处京师。”及北去，道路有觞酒豆肉，必遗故客。属纆之日，囊装惟酒食器皿而已，识者无不高之。

（张）砺素耿直，嗜酒无检。

刘仁恭镇幽州，阿巴曾引众寇平州，仁恭遣骁将刘雁郎与其子守光率五百骑先守其州，阿巴不知，为郡人所给，因赴牛酒之会，为守光所擒。

卷一百三 汉书五（节录） 慕容彦超以大军驻于七里郊，掘堑以自卫，都下率坊市出酒食以餉军。

卷一百五 汉书七（节录）（刘）信性昏懦，黷货无厌，喜行酷法。掌禁军时，左右有犯罪者，召其妻子，对之脔割，令自食其肉；或从足支解至首，血流盈前，而命乐对酒，无仁愍之色。

卷一百七 汉书九（节录） 未几，三司使王章于其第张酒乐，时弘肇与宰相、枢密使及内客省使阎晋卿等俱会。酒酣，为手势令，弘肇不熟其事，而阎晋卿坐次弘肇，屡教之。苏逢吉戏弘肇曰：“近坐有姓阎人，何忧罚爵！”弘肇妻阎氏，本酒妓也，弘肇谓逢吉讥之，大怒，以丑语诟逢吉。

（王）章急于财赋，峻于刑法，民有犯盐、矾、酒曲之令，虽丝毫滴沥，尽处极刑。

（郭）谨在镇，（郭）允明常赍御酒以遗之，不以僭上犯禁为意。

卷一百八 汉书十（节录）（李）崧二弟屿、巖，酣酒无识，与杨邠、苏逢吉子弟杯酒之间，时言及夺我居第，逢吉知之。

苏逢吉，长安人。父悦，逢吉母早丧，而悦鰥居，旁无侍者。性嗜酒，虽所饮不多，然漱醪终日。

（苏逢吉）尝于私第大张酒乐，以召权贵，所费千余缗。

卷一百九 汉书十一（节录） 既行，至永兴，副使安友规、巡检使乔守温出迎，于郊外离亭



置酒。

(赵)思绾尝对众取人胆以酒吞之，告众曰：“吞此至一千，即胆气无敌矣。”

卷一百一十 周书一 太祖纪第一（节录） 先是，军中禁酒，帝有爱将李审犯令，斩之以狗。

(天成)二年八月五日，帝自河中班师，其月二十七日入朝。汉帝命升阶抚劳，酌御酒以赐之，锡赉优厚。

至是，遣朱宪伴送来使归蕃，兼致书叙革命之由，仍以金酒器一副、玉带一遗鄂约。

卷一百一十二 周书三 太祖纪第三（节录） (广顺二年)六月乙酉朔，帝幸曲阜县，谒孔子祠。既奠，将致拜，左右曰：“仲尼，人臣也，无致拜。”帝曰：“文宣王，百代帝王师也，得不敬乎！”即拜奠于祠前。其所奠酒器、银炉并留于祠所。

卷一百一十六 周书七 世宗纪第三（节录） (显德三年二月)壬午，江南国主李景遣其臣伪翰林学士户部侍郎钟谖、伪工部侍郎文理院学士李德明等，奉表来上，叙愿依大国称臣纳贡之意，仍进金器千两，锦绮绫罗二千匹及御衣、犀带、茶茗、药物等，又进犒军牛五百头，酒二千石。

蚤者，泗州主将递送到书一函；寻又使人钟谖、李德明至，赉所上表及贡奉衣服腰带、金银器币、茶药牛酒等；今又使人孙晟等并到行朝。

卷一百一十八 周书九 世宗纪第五（节录） (显德五年)夏四月癸丑，宴从臣及江南进奉使冯延巳等于行宫，徐辽代李景捧寿觞以献，进金酒器、御衣、犀带、金银、锦绮、鞍马等。

卷一百二十三 周书十四 列传第三（节录） (郑)仁海幼事唐骁将陈绍光，恃勇使酒，尝乘醉抽佩剑，将剗刃于仁海，左右无不奔避，唯仁海端立以俟，略无惧色。

卷一百二十五 周书十六 列传第五（节录） 及(冯)晖到镇，大张宴席，酒馔丰备，群夷告醉，争陈献贺，晖皆以锦彩酬之，蕃情大悦。

卷一百二十七 周书十八 列传第七（节录） (和)矩性嗜酒，不拘礼节，虽素不知书，见士未尝有慢色，必罄家财以延接。

卷一百二十八 周书十九 列传第八（节录） (萧)愿性纯谨，承事父母，未尝不束带而见。然性嗜酒无节，职事弛慢。

(司徒)诩善谈论，性嗜酒，喜宾客，亦信浮屠之教。

卷一百二十九 周书二十 列传第九（节录） (常思)性又鄙恠，未尝与宾佐有酒肴之会。尝有从事欲求谒见者，思览刺而怒曰：“彼必是来猎酒也。”命典客者饮而遣之，其鄙恠也如是。

宾朋至，(翟光邺)则贯酒延之，谈说终日，略无厌倦，士大夫多之。及权知京兆，以宽静为治，前政有烦苛之事，一切停罢，百姓便之。及病甚，召亲随于卧内，戒之曰：“气绝之后，以尸归洛，不得于此停留，虑烦军府。”言讫而终。京兆吏如丧所亲，或有以浆酒遥奠者。

卷一百三十 周书二十一 列传第十（节录） 时租庸使赵岩访(张)筠于其第，筠召峻声歌以侑酒，岩悦，筠因以赠之，颇得亲爱。

卷一百三十一 周书二十二 列传第十一（节录） 广顺二年春，朝廷以皞为高丽册使。三月，至郢，节度使高行周以皞嗜酒，留连累日，且晚沉醉。其月二十三日，晨兴栉发，状如醉寐，男泳视之，已卒矣。时年六十一。其年八月，郢帅齐王高行周亦梦鬼请齐王判官，得无是乎！皞从儒学，好聚书，嗜酒无仪检，然衷抱无他，急于行义，士友以此多之。

卷一百三十二 世袭列传第一（节录） (李从曷)镇于岐山，前后二纪，每花繁月朗，必陈胜会以赏之，客有困于酒者，虽吐茵堕帻而无厌色。

卷一百三十三 世袭列传第二（节录） 及庄宗定天下，(高)季兴来朝于洛阳，加兼中书

令，时论多请留之，郭崇韬以方推信义于华夏，请放归藩，季兴促程而去。至襄州，酒酣，谓孔勅曰：“是行有二错：来朝一错，放回二错。”

卷一百三十四 僭伪列传第一（节录）（李）景闻之大惧，遣其臣钟谟、李德明等奉表于世宗，乞为附庸之国，仍岁贡百万之数，又进金银器币及犒军牛酒。

时泉州刺史廖彦若为政贪暴，军民苦之，闻（王）潮为理整肃，耆老乃奉牛酒，遮道请留。

卷一百三十六 僭伪列传第三（节录）时宫人皆衣道服，顶金莲花冠，衣画云霞，望之若神仙，及侍宴，酒酣，皆免冠而退，则其髻髻然。又构怡神亭，以佞臣韩昭等为狎客，杂以妇人，以恣荒宴，或自旦至暮，继之以烛。伪嘉王宗寿侍宴，因以社稷国政为言，言发涕流，至于再三。同宴佞臣潘在迎等并奏衍云：“嘉王好酒悲。”因翻恣谐谑，取笑而罢。

卷一百三十七 外国列传第一（节录）（耶律）案巴坚因曰：“理当如此，我汉国儿子致有此难，我知之矣。闻此儿有宫婢二千，乐官千人，终日放鹰走狗，耽酒嗜色，不惜人民，任使不肖，致得天下皆怒。我自闻如斯，常忧倾覆，一月前已有人来报，知我儿有事，我便举家断酒，解放鹰犬，休罢乐官。我亦有诸部家乐千人，非公宴未尝妄举。我若所为似我儿，亦应不能持久矣，从此愿以为戒。”

卷一百三十八 外国列传第二（节录）其（党项）每至京师，明宗为御殿见之，劳以酒食，既醉，连袂歌呼，道其土风以为乐，去又厚以赐赍，岁耗百万计。

卷一百四十一 志三 五行志（节录）（汉乾祐元年七月）开封府奏，阳武、雍丘、襄邑等县蝗，开封尹侯益遣人以酒肴致祭，寻为鹄鸽食之皆尽。

卷一百四十四 志六 乐志上（节录）晋天福四年十二月，礼官奏：“来岁正旦，王公上寿，皇帝举酒，请奏元同之乐；再举酒，奏文同之乐。”从之。

卷一百四十六 志八 食货志（节录）后唐天成三年七月，诏曰：“应三京、邺都、诸道州府乡村人户，自今年七月后，于是秋田苗上，每亩纳曲钱五文足陌，一任百姓自造私曲，酝酒供家，其钱随夏秋征纳。其京都及诸道州府县镇坊界内，应逐年买官曲酒户，便许自造曲，酝酒货卖。仍取天成二年正月至年终一年逐户计算都买曲钱数征，十分只纳二分，以充榷酒钱，便从今年七月后，管数征纳。榷酒户外，其余诸色人亦许私造酒曲供家，即不得衷私卖酒，如有故违，便即纠察，勒依中等酒户纳榷。其坊村一任沽卖，不在纳榷之限。”时孔循以曲法杀一家于洛阳，或献此议，以为爱其人，便于国，故行之。

长兴元年二月，赦书节文：“诸道州府人户，每秋苗一亩上，元征曲钱五文，今后特放二文，只征三文。”

二年，诏曰：“酒醴所重，曲蘖是须，缘卖价太高，禁条颇峻，士庶因斯而抵犯，刑名由是以滋彰。爰行改革之文，庶息烦苛之政，各随苗亩，量定税钱。访闻数年已来，虽犯法者稀，而伤民则甚。盖以乱离日久，贫下户多，才遇升平，便勤稼穡，各务耕田凿井，孰能枕曲藉糟，既随例以均摊，遂抱虚而输纳，渐成雕敝，深可悯伤。况欲致丰财，必除时病，有利之事，方切施行，无名之求，尤宜废罢，但得日新之理，何辞夕改之嫌。应在京诸道苗亩上所征曲钱等，便从今年夏并放。其曲官中自造，委逐州减旧价一半，于在城扑断货卖。除在城居人不得私造外，乡村人户或要供家，一任私造。”敕下之日，人甚悦之。

周显德四年七月，诏曰：“诸道州府曲务，今后一依往例，官中禁法卖曲，逐处先置都务，候敕到日，并仰停罢。据见在曲数，准备货卖，兼据年计合，使曲数依时鬻造，候人户将到价钱，据数给曲，不得赊卖抑配与人。”

卷一百四十八 志十 选举志（节录）（晋天福）五年三月，诏：“及第举人与主司选胜筵宴，及中书舍人鞞鞋接见举人，兵部、礼部引人过堂之日，幕次酒食会客，悉宜废之。”（百衲本景

印吴兴刘氏嘉业堂刻本《旧五代史》)

毕田

毕田，长沙（今属湖南）人。宋真宗朝官王府侍讲，奏謁临湘七都科调。有《湘中故事》，已佚。

醉乡

三宿酣神酎，乡名因此呼。山中千日者，自合是仙都。（清函海本《全五代诗》卷六十四）

徐铉

徐铉（917—992），字鼎臣，扬州广陵（今江苏扬州）人。初仕吴，为校书郎。事南唐李璟，历官太子右谕德、知制诰、中书舍人。后主李煜嗣位，任礼部侍郎、尚书左丞、兵部侍郎、御史大夫、吏部尚书，充翰林学士。随后主入宋，为太子率更令、右散骑常侍，迁左常侍。淳化二年贬静难军行军司马，明年八月二十六日卒。铉长于为文，尤精小学，曾奉诏校定《说文》，著《质论》数十篇、《稽神录》二十卷、文集三十卷。《宋史》及《文苑传》有传。

柳枝辞十二首（选一首）

把酒凭君唱柳枝，也从丝管递相随。逢春只合朝朝醉，记取秋风落叶时。（四部丛刊景黄丕烈校宋本《徐公文集》卷第二）

抛球乐辞二首（选一首）

歌舞送飞球，金觥碧玉筹。管弦桃李月，帘幕凤凰楼。一笑千场醉，浮生任白头。（同上卷第四）

得酒

酌此杯中物，茱萸满把秋。今朝将送别，他日是忘忧。世乱方多事，年加易得愁。政成频一醉，亦未减风流。（同上卷第四）

和陈表用员外求酒

暑天频雨亦频晴，帘外闲云重复轻。珍重一壶酬绝唱，向风遥想醉吟声。（同上卷第五）

蒙恩赐酒奉旨令醉进诗以谢

明光殿里夜迢迢，多病逢秋自寂寥，蜡炬乍传丹凤诏，御题初认白云谣。今宵增识衢樽味，明日知停入合朝。为感君恩判一醉，不烦辛苦解金貂。（同上卷第五）

和李秀才雪中求酒

雪英飘洒绕虚廊，晓景沉沉朔吹狂。银阙晶荧标帝里，桂华纷糅认仙乡。少年风味新吟动，老叟襟怀万事忘。自倒空樽酬绝唱歌，书帙聊得泛寒光。（同上卷第二十二）

李昉

李昉（925—996），字明远，深州饶阳（今河北饶阳）人。后汉乾祐中举进士，仕汉、周，官至屯田郎中、翰林学士。宋初，加中书舍人。太宗即位，加户部侍郎，迁工部尚书、兼翰林承旨。太平兴国八年（983），擢参知政事，拜平章事，加中书侍郎。端拱初罢相。淳化二年（991）复相，四年罢。至道二年卒，年七十二。昉典诰命三十余年，曾奉敕纂《太平御览》、《文苑英华》、《太平广记》，有文集五十卷。文章慕白居易，浅近易晓。《宋史》有传。

酒母

酒母，阙下酒妇。遇师呼于老者，不知何许人也。年五十余，云已数百岁。酒妇异之，每加礼敬。忽来谓妇曰：“急装束，与汝共应中陵王去。”是夜果有异人来，持二茅狗，一与于老，一与酒妇，俱令骑之，乃龙也。相随上华阴山上，常大呼云：“于老酒母在此。”（出《女仙传》）（民国景明嘉靖谈恺刻本《太平广记》卷五十九）

女儿

女儿者，陈市上酒妇也，作酒常美。仙人过其家饮酒，即以素书五卷质酒钱。几开视之，乃仙方养性长生之术也。几私写其要诀，依而修之。三年，颜色更少，如二十许人。数岁，质酒仙人复来，笑谓之曰：“盗道无师，有翅不飞。”女儿随仙人去，居山历年，人常见之。其后不知所适，今所居即女儿山也（出《女仙传》）。（同上卷五十九）

千日酒

昔有人名玄石，从中山酒家沽酒。酒家与千日酒，忘语其节。至家醉卧，不醒数日。家人不知，以为死也，具棺殓葬之。酒家至千日，乃忆玄石前来沽酒，醉当醒矣。遂往索玄石家而问之，云：“石亡已三年，今服阕矣。”于是与家人至玄石墓，掘冢开视，玄始醒，起于棺中（出《博物志》）。（同上卷二百三十三）

擒奸酒

河东人刘白坠者善于酿酒。六月中时暑赫，刘以罌贮酒，曝于日中。经一旬，酒味不动，饮之香美，醉而不易醒。京师朝贵出郡者，远相餽馈，逾于千里。以其可至远，号曰“鹤觞”，亦名“骑驴酒”。永熙中，青州刺史毛鸿宾带酒之任。路中夜逢劫盗，盗饮之皆醉，遂备擒获。因此复名“擒奸酒”。游侠语曰：“不畏张弓拔刀，唯畏白坠春醪。”（出《伽蓝记》）（同上卷二百三十三）

若下酒

《輿地志》：村人取若下水以酿酒，醇美。俗称“若下酒”。张协士所云“荆州乌程，豫北竹叶”，即此是也（出《十道记》）。（同上卷二百三十三）

昆仑觞

魏贾羈家累千金，博学善著作。有苍头善别水，常令乘小舟于黄河中。以瓠匏接河源水，一日不过七八升。经宿，器中色如绛。以酿酒，名“昆仑觞”，酒之芳味，世间所绝。曾以三十斛上魏庄帝（出《酉阳杂俎》）。（同上卷二百三十三）

碧筒酒

历城北有使君林。魏正始中，郑公恚三伏之际，每率宾僚避暑于此。取大莲叶置砚格上。盛酒三升。以簪刺叶，令与柄通。屈茎上，轮菌如象鼻。传吸之，名为“碧筒”。历下效之，言酒味杂莲气，香冷胜于冰（出《酉阳杂俎》）。（同上卷二百三十三）

九酝酒

张华既贵，有少时知识来候之。华与共饮九酝酒，为酣畅，其夜醉眠。华常饮此酒，醉眠后，辄敕左右，转侧至觉。是夕，忘敕之。左右依常时为张公转侧，其友人无人为之。至明，友人犹不起。华咄云：“此必死矣。”使视之，酒果穿肠流，床下滂沱（出《世说》）。（同上卷二百三十三）

消肠酒

张华为醇酒，煮三薇以渍曲蘖。蘖出西羌，曲出北胡。胡中有指星麦，四月火星出，获麦而食之。蘖用水渍，三夕而麦生萌芽。以平旦时鸡初鸣而用之，俗人呼为鸡鸣麦。以酿酒，清美鬯。久含令人齿动，若大醉不摇荡，使人肝肠烂，当时谓之消肠酒。或云，醇酒可为长宵之乐。二说声同而事异焉（出《王子年拾遗记》）。（同上卷二百三十三）

青田酒

乌孙国有青田核，莫知其树与实。而核大如五六升瓠，空之盛水，俄而成酒。刘章曾得二枚，

集宾设之，可供二十人。一核方尽，一核所盛，复中饮矣。唯不可久置，久则味苦难饮。因名其核曰“青田壶”，酒曰“青田酒”（出《古今注》）。（同上卷二百三十三）

黏雨酒

石虎于大武殿前起楼，高四十丈。结珠为帘，垂五色玉佩。上有铜龙，腹空，盛数百斛酒。使胡人于楼上喂酒，风至，望之如云雾。名曰“黏雨台”，使以洒尘（出《拾遗录》）。（同上卷二百三十三）

酒名

酒名：郢之“富水”，乌城之“若下”，荥阳之“土窟春”，富平之“石冻春”，剑南之“烧春”，河东之“乾和蒲桃”，岭南之“灵溪博罗”，宜成之“九酝”，浔阳之“湓水”，京城之“西市腔”，虾蟆陵之“郎官清”。河汉之“三勒浆”，其法出波斯。三勒者，谓庵摩勒、毗黎勒、诃黎勒（出《国史补》）。（同上卷二百三十三）

南方酒

新州多美酒。南方酒不用曲蘖，杵米为粉，以众草叶胡蔓草汁漉，（南人呼“野葛”为“胡蔓草”）大如卵，置蓬蒿中阴蔽，经月而成。用此合糯为酒。故剧饮之后，既醒，犹头热涔涔，有毒草故也。南方饮既烧。即实酒满瓮，泥其上，以火烧方熟。不然，不中饮。既烧即揭瓶趋虚，泥固犹存。沽者无能知美恶，就泥上钻小穴可容筋，以细筒插穴中，沽者就吮筒上，以尝酒味，俗谓之“滴淋”。无赖小民空手入市，遍就酒家滴淋，皆言不中，取醉而返。南人有女数岁，即大酿酒。既漉，候冬陂池水竭时，置酒罌，密固其上，瘞于陂中。至春涨水满，不复发矣。候女将嫁，因决陂水，取供贺客。南人谓之“女酒”。味绝美，居常不可致也（出《投荒杂录》）。（同上卷二百三十三）

李景让

大中年，丞郎宴席，蒋伸在座。忽斟一杯言曰：“席上有孝于家，忠于国，及名重于时者，饮此爵。”众皆肃然，无敢举者。独李公景让起引此爵，蒋曰：“此宜其然。”（出《卢氏杂说》）（同上卷二百三十三）

夏侯孜

崔郢为京尹日，三司使在永达亭子宴丞郎。崔乘酒突饮，众人皆延之。时谯公夏侯孜为户部使，问曰：“尹曾任给舍否？”崔曰：“无。”谯公曰：“若不曾历给舍，京光尹不合冲丞郎宴。命酒纠来，命下筹，且吃罚爵。”取三大器物。引满饮之。良久方起（出《卢氏杂说》）。（同上卷二百三十三）

孙会宗

唐孙会宗仆射，即渥相大王父也。宅中集内外亲表开宴。有一甥侄为朝官，后至。及中门，见绯衣官人，衣襟前皆是酒漉，咄咄而出。不相识。顷即席，说于主人。讶无此官。沉思之，乃是行酒时，阶上酹酒，草草倾泼也。自此每酹酒，止则身恭跪，一酹而已，自孙氏始，今人三酹非也（出《北梦琐言》）。（同上卷二百三十三）

陆扈

陆相扈出典夷陵时，有士子修谒。相国与之从容，因命酒酌劝。此子辞曰：“天性不饮酒。”相曰：“诚如所言，已校五分矣。盖平生悔吝有十分，不为酒困，自然减半也。”（出《北梦琐言》）（同上卷二百三十三）

山涛

山涛字巨源，饮酒量至八斗。武帝欲试之，使人私默以记之，至量而醉（出《晋书》）。（同上卷二百三十三）

周顛

周顛字伯仁，饮酒至量一石。及过江，虽日醉，每恨无对。偶有归对北来，顛遇之，为忻然。乃置酒二石共饮，各大醉。及醒，顛使人视，客已腐肋而死矣（出《晋书》）。（同上卷二百三十三）

裴弘泰

唐裴均之镇襄州，裴弘泰为郑滑馆驿巡官，充聘于汉南。遇大宴，为宾司所漏。及设会，均令走屈郑滑裴巡官。弘泰奔至，均不悦。责曰：“君何来之后，大涉不敬。酌后至酒，已投纠筹。”弘泰谢曰：“都不见客司报宴，非敢慢也。叔父舍罪，请在座银器，尽斟酒满之。器随饮以赐弘泰，可乎？”合座壮之，均亦许焉。弘泰次第揭座上小爵，以至觥船。凡饮皆竭，随饮讫。即置于怀，须臾盈满。筵中有银海，受一斗以上，其内酒亦满。弘泰以手捧而饮，饮讫。目吏人，将海覆地，以足踏之，卷抱而出，即索马归驿。均以弘泰纳饮器稍多，色不怩。午后宴散，均又思弘泰之饮，必为酒过度所伤，忧之。迨暮，令人视饮后所为。使者见弘泰戴纱帽，于汉阴驿厅，箕踞而坐。召匠秤得器物，计二百余两。均不觉大笑。明日再饮，回车日，赠遗甚厚（出《乾膺子》）。（同上卷二百三十三）

王源中

王源中，文宗时为翰林承旨。暇日，与诸昆季蹴鞠于太平里第。球子击起，误中源中之额，薄有所损。俄有急召，比至，上讶之。源中具以上闻，上曰：“卿大雍睦。”命赐酒二盘，每盘